

SOALAN NO. 33

PEMBERITAHUAN PERTANYAAN BAGI JAWAPAN BUKAN LISAN
MESYUARAT PERTAMA, PENGGAL KEEMPAT
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : JAWAB BUKAN LISAN

**DARIPADA : DATUK SERI PANGLIMA ANNUAR BIN MUSA
(KETEREH)**

TARIKH : 7 MAC 2016 (ISNIN)

SOALAN :

**DATUK SERI PANGLIMA ANNUAR BIN MUSA (KETEREH) minta
MENTERI PEMBANGUNAN WANITA, KELUARGA DAN MASYARAKAT
menyatakan :-**

- (a) jumlah penerima e-Kasih di Kelantan ; dan
- (b) apakah sasaran Kementerian agar bantuan yang diberikan mampu membolehkan golongan miskin tegar ini mampu berdikari dan berdiri atas kaki sendiri dan tidak bergantung kepada bantuan Kerajaan selama-lamanya.

JAWAPAN: **YB DATO' SRI ROHANI ABDUL KARIM, MENTERI PEMBANGUNAN WANITA, KELUARGA DAN MASYARAKAT**

Negeri Kelantan mencatatkan jumlah penyertaan dalam sistem eKasih seramai **223,971** orang secara keseluruhannya yang meliputi penyertaan lelaki seramai **121,738** orang (**54.35%**) dan penyertaan wanita seramai **102,233** orang (**45.64%**) iaitu setakat 3 Mac 2016. Daripada jumlah tersebut, terdapat seramai **39,914** orang penyertaan adalah daripada Parlimen Ketereh iaitu masing-masing dengan penyertaan seramai **21,717** orang (**54.41%**) adalah lelaki dan **18,197** orang (**45.59%**) adalah wanita.

Kementerian Pembangunan Wanita melaksanakan program-program bagi membolehkan golongan miskin yang menerima bantuan JKM agar mampu berdikari dan tidak bergantung kepada bantuan Kerajaan selama-lamanya. Antara program berkenaan adalah:

1) Geran Pelancaran

Ia merupakan bantuan sekali gus kepada penerima bantuan JKM yang produktif bagi memulakan projek atau aktiviti ekonomi agar

mereka dapat berdikari dan seterusnya keluar daripada kepompong kemiskinan. Geran Pelancaran ini diberikan secara one-off iaitu maksimum sebanyak RM2,700 bagi setiap penerima. Pada tahun 2015, sejumlah RM4.137 juta telah disalurkan kepada 1,196 orang penerima sebagai modal permulaan untuk memulakan perniagaan.

2) ***Productive Welfare***

Ia merupakan inisiatif inovasi sosial bagi menggalakkan penerima bantuan Jabatan yang produktif agar berdikari melalui program menjana pendapatan dan meningkatkan taraf hidup mereka agar tidak bergantung selamanya kepada bantuan Kerajaan. Antara projek yang dilaksanakan adalah pembuatan produk kraf, aksesori wanita, makanan siap proses dan lain-lain. Program di bawah *Productive Welfare* iaitu 2 Years Exit Programme (2YEP) mensasarkan penerima bantuan boleh berdikari dalam tempoh 2 tahun dengan diberikan Geran Pelancaran. Projek Rintis 2YEP telah dilaksanakan di dua buah negeri iaitu Negeri Sembilan dan Negeri Perlis dengan penglibatan seramai 503 orang. Didapati seramai 182 orang peserta dari JKM Negeri Sembilan dan 19 orang peserta dari JKM Negeri Perlis berpotensi untuk ditamatkan bantuan.

4) Program 1AZAM

Program 1AZAM di bawah Bidang Keberhasilan Utama Negara atau National Key Result Areas (NKRA): Meningkatkan Taraf Hidup Isi Rumah Berpendapatan Rendah (LIH) di bawah KPWKM adalah sebuah program yang berteraskan kebijakan produktif dengan menyediakan peluang menjana pendapatan kepada golongan berpendapatan rendah bagi meningkatkan pendapatan keluarga melalui beberapa bidang seperti berikut:

BIL	BIDANG	AZAM	AGENSI PELAKSANA
1	Perniagaan	Niaga	KPWKM Amanah Ikhtiar Malaysia (AIM)
2	Perkhidmatan	Khidmat	Kerajaan Negeri Sabah Kerajaan Negeri Sarawak
3	Pertanian	Tani	Kementerian Pertanian dan Industri Asas Tani Kerajaan Negeri Sabah Kerajaan Negeri Sarawak
4	Pekerjaan	Kerja	Kementerian Sumber Manusia Kerajaan Negeri Sabah Kerajaan Negeri Sarawak

Bagi tempoh Januari 2010 hingga 31 Disember 2015, Program 1AZAM telah mendapat sambutan yang menggalakkan dengan penyertaan sejumlah 190,799 orang dari seluruh negara. Daripada jumlah 190,799

orang peserta tersebut, terdapat seramai 15,904 orang (15%) peserta 1AZAM daripada bulan Januari hingga Disember 2012 telah berjaya meningkatkan pendapatan keluarga hingga melepassi Paras Garis Kemiskinan (PGK) manakala seramai 7,936 orang (7.31%) peserta Program 1AZAM (AZAM Niaga dan Khidmat) KPWKM telah meningkatkan pendapatan keluarga melebihi RM200. Manakala bagi tahun 2013 sehingga 31 Disember 2015, terdapat seramai 49,420 orang (61%) peserta Program 1AZAM telah meningkatkan pendapatan keluarga melebihi RM300.

Di Parlimen Ketereh terdapat seramai 153 orang peserta yang telah berjaya meningkatkan pendapatan dari tahun 2011 sehingga 2015. Daripada jumlah tersebut, 43 orang adalah lelaki (28.10%) dan 110 orang adalah wanita (71.90%).

Berdasarkan kepada Analisis Impak Peserta Program 1AZAM yang dilakukan oleh pihak Kementerian, didapati bahawa Program 1AZAM (Niaga dan Khidmat) KPWKM telah mencapai matlamat utama program tersebut iaitu untuk meningkatkan taraf kehidupan isi rumah berpendapatan rendah serta mengubah daya pemikiran peserta untuk menjadi lebih

berdikari. Sehubungan itu, KPWKM sebagai Kementerian peneraju masih meneruskan Program 1AZAM di bawah GTP 3.0 hingga tahun 2020 bagi memastikan inisiatif ini dapat memberi impak secara berterusan daripada segi peningkatan pendapatan golongan berpendapatan rendah selaras dengan konsep kebijakan produktif dan seterusnya menjadikan kesemua penerima mampu untuk hidup berdikari.